

Bai Serka DjE Dirèkt!

Algun aña pasá, siudat di Los Angeles a ofresé un servisio telefóniko. E kliente por hasi un yamada i konfesá un ke otro “piká” anónimo pa 1 minüt. Kada dia nan ta haña 200 yamada.

Un yùfrou ku a kousa un aksidente di outo resultando den sinku morto a yama, “Mi ke bisa solamente ku ta duel mi. Mi tin gana mi por pone nan biba atrobe.” Un yònkuman di 19 aña a bisa: “Mama, tata, ta duel mi, pero mi ta homoseksual. I nunca nunca lo mi kambia.”

E kompania telefóniko a ofresé un otro servisio tambe. Kualke persona por yama i skucha e konfeshonnan. Pa skucha, nan a kobra \$2 pa e promé minüt i \$0,45 pa kada minüt despues. Kada dia 10.000 hende ta paga pa skucha e konfeshonnan.

E hendenan aki ta konfesá! Ma nan a wòrdu pordoná?

Si bo ke haña pordon pa bo ofensanan, na ken bo mester konfesá? E kontesta ta mas kla ku di dia. **Bo mester konfesá bo ofensa na esun ku bo a ofendé.**

Si mi ta hòrta fl. 150 for di bo, na ken mi mester atmití esei pa mi por wòrdu pordoná? Klaramente mi mester konfesá **na BO**. Mi mester atmití na bo ku mi a hòrta bo sèn anto “come across” tambe, esta pagábo e fl. 150 bèk. Abo ta esun ku mi a ofendé ku mi piká. Bo por tenémi na kurason òf pordonámi. Ningun otro hende por pordonámi na bo lugá.

Kualke biaha ku bo ta kometé un òf otro ofensa kontra un persona, bo tin mester di su pordon pa e relashon por drecha bèk.

Ma bo piká ta ofendé un otro Persona...Dios. Di bèrdat, **kada un di bo pikánan ta un ofensa kontra Dios**. David, despues di kometé adulterio anto asesinato, a skirbi, “*Kontra Abo...mi a peka i a hasi loke ta malu den Bo bista...*” (Salmo 51:4). Un otro teksto ta laga sa, “*..boso inikidatnan a kousa separashon entre boso i boso Dios; i boso pikánan a hasi ku Su kara a keda skondí pa boso, asina ku E no ta tende*” (Isaias 59:2). Ta impusibel pa hasi piká i keda sin ofendé Dios!

Pa bo por haña Dios Su pordon, na ken bo mester konfesá? Klaramente, **na Dios!** Beibel ta laga sa ku bo mester bai dirèkt serka Dios “*Pasobra ta ún Dios so tin, i ún Mediator tambe entre Dios i hende, e hende Kristo Hesus*” (1 Timoteo 2:5). **Ningun teksto den Skritura ta indiká ku Dios a outorisá un persona òf un misa pa pordoná bo piká na Su lugá.**

Dios so por pordoná bo piká kontra djE. Hesus, siendo Dios, por pordoná! Ora Hesus a kamna riba mundu, na mas ku un okashon El a bisa “*Bo pikánan ta pordoná*”. Algun líder religioso a rasoná korektamente: “*Pakiko e hòmber aki ta papia asina...? ...Ken por pordoná piká, si no ta Dios so?*” (Marko 5:5-7). Dios so por pordoná. Hesus ta Dios. Pesei E por a pordoná!

Riba krus, Hesus a pidi Dios pa pordoná, “*Tata, pordoná nan, pasobra nan no sa kiko nan ta hasi*” (Lukas 23:34)

Kua di nos nunca a yega di hasi piká? Nos tur! Dios santu no por tolerá ni ún piká! E mester kastigá piká, òf E no ta hustu mas! Komo resultado, nos tur ta destiná pa sufri kastigu eterno na fièrnu—separá for di Dios santu.

Ma Dios ta stimábo. E no ke mandábo fièrnu. E no ke pa bo ta separá for di djE. Ma e úniko manera ku bo por skapa e destino horibel eterno ei ta dor di haña Dios Su pordon. Bo por haña Dios Su pordon no dor di aktonan di penitensia, no dor di keda resa siertu orashon, no dor di nenga bo mes siertu deseo. Bo por haña Dios Su pordon dor di pidi E dirèkt pa E pordonábo. “*Si nos konfesá nos pikánan, E ta fiel i hustu pa pordoná nos nos pikánan i pa limpia nos di tur inhustisia*” (1 Juan 1:9).

Atmití na Dios ku bo ta un pekadòr ku ta meresé un eternidat na fièrnu—ku abo ta esun ku a meresé pa muri riba krus, no Hesus. Anto pidiE pa pordoná bo piká i salbábo di fièrnu. E lo hasié. Bai serka djE dirèkt!